

Kontuola

ANTZUOLA / Egubakoitza / 2002ko ekainaren 21a / 118. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com

PIEDAD LUGARIZARISTI/KALEBARRENGO BIZILAGUNA

“Gabian harrapatutako arbolia jartzen zebeñ San Pedro bezperan”

AINTZANE IRIZAR

Asteburuan, San Pedroak ospatuko dituzte Kalebarrenen. Denetik egongo da: erromeriak, asto lasterketa, pailazoak... Baina zela ospatzen zituzten jaiak orain dela urte batzuk? Piedadekin berba egin dugu horixe jakiteko.

Zela gogoratzen dituzu zure gazte denborako Kalebarren-go jaiak?

Dantza asko egiten giñuan gazte denboran, eta *kalabazak* be asko emoten giñutzen. Orduetik hona asko aldatu dira Kalebarren-go jaiak; garai hartan, San Pedro egunian bertan ospatzen ziran jaiak, nahiz eta aste barruan tokatu. Hori gauza ederra izaten zan, bestela, jaittik jaira dantzarik egitteke luze egiten jakun. Oin, berriz, gaztiok ez dakit dantzarik be egiten dozuen.

Garai hartan, non egiten zen erromeria?

Kalebarren-go plazatxuan izaten zan erromerixia. Dana dala, lehen, kotxerik be ez zan ibiltzen, eta kalia zihar be dantzan egi-

tten giñuan. Jente mordua etortzen zan kanpotik, gehixenak, oinez: Elosutik, Osintxutik, Bergararik... Kalebarren, gaiñera, beti izan da Antzuolan bizitasun haundixen euki daben tokixa.

Erromeriaz gain, ze beste egoten zen?

Bezperan, arbolia jartzen zan plazatxuan; auzoko mutil gaztiok gabian harrapatutako arbolia jartzen zebeñ; izan be, San Pedro lapurra ei zan. Gaur egunian, iturririxaren onduan jartzen dabe. Neskok, berriz, koroia egiten giñuan, arboliari jartzeko.

Bezperan sua be egiten zan, San Juan bezperan bezelaxe. Oin, erreka baztarrian egiten dabe, beste lekurik ez dago-eta. Lehenago, frontoirako bidian egiten zan sua.

Asto lasterketa egiten zen?

Bai, hori aspaldiko ohiturria da. Lagata be egon zan, astuei tratu txarrak emoten jakuelako.

Gaur egun, zela ospatzen dituzu Kalebarren-go jaiak?

Lo egiten lagatzen badoskue, pozik! Edadiakin oso diferentziak izaten dira jaiak; oin, dantzarik be ez dogu egiten.



AINTZANE IRIZAR

JAIETAKO EGITERAUAK

KALEBARREN

EGUBAKOITZA 21

20:00: Suziri jaurtiketa
22:30: Bidusound diskoteka mugikorra Zurrategin

ZAPATUA 22

11:00: Marrakzi lehiaketa
12:30: Soinu jotzaileak
18:30: Kiki, Moko eta Flax pailazoak
19:00: Buruhandiak
20:00: Arbola jasotzea Ondarreko gaitariekin
21:00: Herri afaria
22:30: Erromeria Koska taldearekin
00:00: Sagar dantza eta sua

DOMEKA 23

10:00: Txistulariekin goiz-eresia
11:30: Meza. Gero, salda eta txorizoa banatuko dute
12:30: Dantza saioa Oinarin taldeko dantzariekin
18:30: Asto lasterketa

SAN JUANAK

UZARRAGAN DOMEKA 23

12:15: Meza. Horren ondoren, Oinarin dantza taldearen dantza saioa, eta luntxa

HERRIKO PLAZAN DOMEKA 23

20:30: San Juan bezperako ospakizuna herriko plazan: arbola jasotzea, dantza saioa eta leiho eta balkoi ederrenetako sariak ematea.

HERRITARREN HITZA / Jose Mari Ugalde • Erretiratuaren elkarteko presidentea

Erretiratu eta pentsionisten kirol jaia

Arratsaldeko 15:30 eta 16:00ak bitartean hurbildu nintzen pilotaleku ingurura eta momentu batean ikusten ari nintzena egiazkoa ala mamuak ote ziren zalantza izan nuen; nire onera etorriaz, konturatu nintzen egiazkoa zela ikusten nuen guztia:



“Gaixo eta ezinduei laguntzeko beharra sentitu behar dugu”

500etik gora erretiratu sasoiko elkartu ginela festa hori ospatzeko, salto eta brinko, irribarretsu eta jolasteko prest.

Hura ikuskizun alaia, nolabait esateko, udaberriko egunsenti bateko eguzkiaren etorrera distiratsua esan zitekeen zela.

Baina pixka bat nire onera etorriaz, agertu zitzaidan laino multzo bat eta eguzkiaren distira hori lausotu egin zitzaidan eta burura etorri bagenuela

beste talde bat geurea, geure geurea, gaixoak eta ezinduek, hain zuzen ere, han ikusten ez zirenak, eta ahal dugun neu-

rrian, haiek alaitzeko obligazioa sentitu beharra daukagula.

Erraz topatu ohi diogu horri erantzuna, esanaz horretarako daudela goi mailako erakundeak: Foru Aldundia, udaletxea eta abar eta abar. Egia da, baina horien guztien laguntzaz gain, guk ere badugu zereginik.

Pertsona horiek ahalik eta modurik egokienean euren etxean, auzoan edo herrian bizi izateko beharrezko duten laguntza emanaz lagundu beharko genieke.

Ez nuke nahi inor lausotuta ikusterik, baizik eta alai eta irribarretsu, baina esan bezala, beste talde hori ahaztu gabe.

LABUR

Antzuolako Atzegiko kideek Atzegizaleak lortzeko mahaia jarriko dute bihar, zapatua

San Pedro jaiak aprobetxatuz, Antzuolako Atzegikoek, urritasun psikikoak dituztenen senitartekoen elkartekoek, mahaia jarriko dute Kalebarrenen bihar, zapatua. 12:00etatik 13:30era egongo dira hantxe; euren helburua da Atzegizaleak lortzea, Atzegiri eta urritasun psikikoak dituztenei laguntzeko prest dauden herritarrek, hain zuzen ere.

Herriko jaietan tonbola jartzeko, sariak eta dirulaguntza batzen ari da Anelkar

Herriko jaietan herriko plazan jarriko dute tonbola Anelkar elkarteko kideek, aurreko astean aurreratu genizuen moduan. Tonbola horretarako, sariak eta dirulaguntzak batzen jarraitzen dute Anelkar elkarteko kideek. Gogora ezazue, laguntzaren bat eman nahi izanez gero, honako herritar hauekin jar zaitzketela harremanetan: Kontxi Laskurainekin, 943 76 60 62 telefono zenbakian; eta Jabier Etxanizekin, 943 78 70 56 zenbakian.

KIROLA

Udan kirola egiteko aukera guztiendako

AINTZANE IRIZAR

Udako Kirol Ekintzetan adin guztietako herritarrek dute parte hartzeko aukera, gazteek eta helduek. Uztailaren 1etik 18ra, egunero izango dira kirol ekintza horiek guztiak, egunean ordubete inguru.

Gazteendako, 13 eta 20 urte bitartekoendako, hain zuzen ere, hainbat kirol egiteko aukera eskainiko du Udaleko Kirol Zerbitzuak: tenisa, patinajea eta multikirola egin ahal izango dute adin tarte horretako neska-mutilek. Esan bezala, egunero izango dira ekintzok, honako ordutegi hauetan: tenisa, 10:00etatik 11:00etara; patinajea, 11:00etatik 12:00etara; eta multikirola, berriz,

10:30etik 12:00etara. Adin tarte horretako gazte gehienak ikasleak izanik, ikasturtea bukatu eta oporretan daudelako jarri dituzte kirol saioak goizez.

Helduendako, berriz, 20 urteko gorakoendako, tenisa eta patinajea antolatatu ditu Udalak. Tenisa 19:00etatik 20:00etara izango da; patinajea, aldiz, 20:00etatik 21:00etara. Helduen kasuan ere uztailaren 1etik 18ra izango dira kirol ekintza horiek, egunero.

Parte hartu nahi dutenek datorren astelehena baino lehen, (ekainak 24) eman beharko dute izena udaletxeko bulegoetan. Izena ematerakoan, 12 euro ordaindu beharko dira. Kirol ekintza bakoitzerako 8-12 lagunendako lekua dago.



Lau aldiz agertu dira erleak

Bi asteren barruan lau aldiz agertu dira erleak eskola aurreko aldeko plazatxoan. Badirudi elizako hormako zulo baten daukatela erlategia; erregina berria atera eta lehengo tokitik alde egiten ei dute erleak. Lehendabiziko aldian, Teodoro Kortabariak erretiratu zuen erlea, eta plazatxora inguratu ziren eskolako umeei erleen gaieko era guztietako azalpenak eman zizkien Teodorok; adi-adi egon ziren ume guztiak. Ea, bada, toki egokiren bat topatzen duten erleak! /A.I.

IRAKURLIAREN TXOKUA

URREZKO DOMINA (MUNDIALA) ESKOLA KIROLEKO GAZTETXOENTZAT

Denboraldia bukatu eta sorpresa handia jaso genuen joan zen ostiralean Antzuolako haurrekin eskola kirolean aritu garen entrenatzaileok: eskolara gonbidatu gintuzten arratsaldeko zortzi eta erdietan, eta han zeuden gaztetxo denak bilduta; bi bertso eder kantatu zizkiguten eta ondoren bertso hauek idatzita, marko baten oparitu.

Guretzat jaso genezakeen saririk ederrena izan da; lan apur bat egin dugu, bronka batzuk ere bota ditugu (nahiz eta bertsotan hori ez jarri), baina ostiralean mutu utzi gintuzten. Kurtsoan zehar akats batzuk egin ditugu, baina ahalegindu gara kiroltasuna erakusten, eta benetan kiroltasunez erantzun duzue. Zuentzako urrezko domina eta gure esker ona! Jarraitu ezazue horrelaxe! Gu, berriz, ahaleginduko gara aurrerantzean ere ahal dugun neurrian, behintzat, laguntzen.

Kiroltasuna, trebezia eta gizatasuna azaldu duzue, garaipen eta porrot guztien gainetik harremanak eta elkartasuna landu dituzue; txapel handia zuentzat.

ENTRENADORE
TALDEA ETA ESKOLA
KIROLEKO BATZARRA

IRAKURLIAREN TXOKUA

KONTUOLAn zure gutuna argitaratzea nahi izanez gero, kontuola@goiena.com helbidera bidali edo telefono zenbaki honetara dei dezakezue: 943 76 03 97. Beterie, martitzen goiza aurretik bidaltzea komeni da.

LABUR

Antzuolako odol emaile biri urrezko domina eman zieten, eta bosti zilarrezkoa

Joan den domekan, ekainaren 16an, urteko Batzar Nagusia egin zuen Deba ibarreko Odol Emaileen Elkarteak Arrateko Santutegian. Meza entzun ostean, bazkaria egin zuten Arraten elkartutako 182 lagunek. Bazkalostean, 25 eta 50 aldiz odola eman dutenei dominak eman zizkieten hantxe. Tartean, zazpi antzuolarrek jaso zituzten dominak; Eugenio Larrañagak eta Jesus Igartzak urrezko domina jaso zuten. Zilarrezkoa, berriz, honako hauek: Maria Jesus Arbuluk, Casimiro Muxikak, Mari Karmen Iturbek, Jose Mari Iparragirrek eta Ibon Garitanok.

Aiastui Peñak antolatutako bizikleta jolasak ekainaren 30ean bukatuko dira

Ekainaren 30eko San Martzialerako Igoerarekin bukatuko dira bizikleta probak. Joan den asteburuan, Uzarragarako Igoera jokatuzuten: benjaminetan, Jon Iturbek irabazi zuen, Markel Letek bigarren egin zuen eta Aitor Laskurain sailkatu zen hirugarren; alebinetan, berriz, Aitzol Iturbek irabazi zuen, Ibai Zabalo eta Unai Ormaetxearen aurretik; azkenik, Andoni Muguruzak irabazi zuen infantiletan eta Mikel Asensiok txikienen mailan. Bihar, zapatua, 12:00etan, ginkana jolasak egongo dira Zurrategiko plazan.

Antzuolako Kirol Elkarteak denboraldi amaierako jaiak ospatu zuen zapatuan

Joan den zapatuan, ekainaren 15ean, ospatu zuen denboraldi amaierako jaiak Antzuolako Kirol Elkarteak. Afaria izan zuten, eta afa-lostean sari bi banatu zizkieten talde bakoitzeko jokalarari biri. Nesken taldean, Maialen Hernándezek eta Ana Peñalbak jaso zituzten sariak; erregionalen mailan, Ibai Azkaratek eta Jon Arangurennek; gazten mailan, Jon Ander Castrok eta Gorka Igle-siasek. Kadete mailan, azkenik, talde osoari eman zioten saria: jokalariei bat eta talde tekniko osoari beste bat.

Lau triatleta antzuolarrek hartu zuten parte zapatuan Zarauzko Triatloian

Debagoiena Antxintxika taldeko lau antzuolarrek hartu zuten parte joan den zapatuan Zarautzen jokatutako triatloi proban. 2,5 kilometro igerian, 80 bizikletan eta 20 korrika egin behar izan zituzten. Aitor Larreak lortu zuen postu onena: 22. tokian sailkatu zen, lau ordu, 25 minutu eta 55 segundoko denborarekin, Eneko Llanos irabazlearengandik 31 bat minutura. Julen Garitanok 04:41:49ko denbora egin zuen; Carlos Baleztenak 04:45:10ekoa eta Imanol Pildainek, berriz, 05:35:48koa.

Datorren asteburuan ospatuko dituzte San Martzialgo jaiak, ekainaren 29an eta 30ean

Datorren aste buruan, ekainaren 29an eta 30ean, ospatuko dituzte San Martzial jaiak. Ekainaren 29an, zapatuan, goizeko hamaitan hasiko dira ekitaldiak. Plater tiroketa proba egingo dute ordu horretan; arratsaldean ere hainba ekitaldi egongo da. 18:00etan umeendako jolasak egongo dira; nahikoa jolas egin ondoren, 19:00etan, txokolate-jana egongo da eta trikitilariak ere arituko dira; 21:00etan, herri afaria egongo da. Domekan, berriz, 12:00etan, meza izango da; 13:00etan, herriko dantzarien saioa izango dugu; arratsaldean, azkenik, dantzarako aukera izango dugu, 16:00etik aurrera, Joxe Gardokirekin.



**MUEBLES
IGEA**

Sukalderako eta
bainurako altzariak
Altzari rustikoetan
espezializatuak

Zurrategi plaza 4, behea. ANTZUOLA. Tel. eta faxa 943 78 71 80



Juan Cruz
ARGAZKIAK

Herriko plaza 4. Tel. 943 78 70 66. ANTZUOLA